

16/08/1998

Biar Putih Tulang... wajar jadi bacaan wajib di IPT

iewed by Jamudin Idris

KETIKA ruangan Biar Putih Tulang... menjadi medium Kunta Kinte menulis di Berita Harian, tidak ramai yang mengenali penulis sebenarnya. Ada yang meneka Kunte Kinta itu adalah orang luar dari Berita Harian dan ada yang beranggapan penulis itu adalah orang suruhan pengarang kumpulan akhbar berkenaan.

Apa pun mengenai penulisan Kunta Kinte, yang nyata siri yang ditulis dengan gaya bahasa yang bersahaja itu mempunyai ramai peminat termasuk di kalangan ahli politik pembangkang. Jadi tidak hairanlah Ketua Pembangkang, Lim Kit Siang pernah menuduh Kunta Kinte sebagai 'penulis pelacur nasional' apabila Kunta Kinte mengkritik pemimpin pembangkang itu sebagai seorang yang kuat mengkritik tetapi tidak tahan dikritik.

Bagaimanapun, melihat kepada krisis terbaru dalam DAP apabila beberapa orang anggotanya dipecat dan diberi amaran, pembaca tentu dapat melihat menimbang kewajaran kritikan Kunta Kinte dibuat sejak dulu lagi.

Walaupun pojok itu bertahan selama tujuh tahun (1987-93), tidak ramai pembaca yang menyimpan rencana berkenaan. Kini Jabatan Pengajian Media Universiti Malaya mengambil inisiatif menerbitkan rencana yang disiarkan pada ruangan Biar Putih Tulang... itu bagi manfaat ramai.

Bagaimanapun, seperti yang dijelaskan penyusun buku ini yang terdiri daripada pelajar Jabatan Pengajian Media, bukan semua rencana dapat dibukukan kerana tuntutan ruang terhad. Bagaimanapun gaya bahasa dikekalkan. Cuma yang menjadi kelainan ialah sistem pemerenggan yang sedikit diubah bagi disesuaikan dengan gaya sebuah buku.

Buku ini dibahagikan kepada 13 perkara pokok yang disentuh Kunta Kinte iaitu demokrasi, perundangan, raja adil raja disembah, Melayu, Islam, bahasa, kewartawanan, Amerika, Tunku Abdul Rahman, Lim Kit Siang, Datuk Seri Dr Mahathir Mohamad, anekdot serta akhirul kalam.

Sebagai contoh mengenai demokrasi, ada enam artikel yang disiarkan seperti 'Antara demokrasi dan perut tidak berisi', 'Siapa kata demokrasi mati di Malaysia' dan 'Rupa-rupanya ada lagi demokrasi di Malaysia'.

Penulisnya A Kadir Jasin menjelaskan, waktu memulakan ruangan ini, beliau adalah Penolong Pengarang Berita Harian. Pada awalnya Biar Putih Tulang... bertujuan membincangkan isu berkaitan ekonomi yang menjadi bidang pengkhususannya sejak 1972.

Bagaimanapun, apabila Kamikaze, Si Kitol dan T S Lanang berhenti menulis, bidang perbincangan ruangan ini diperluaskan mencakupi pelbagai isu semasa berkaitan politik, sosial, pentadbiran, agama, bahasa, budaya dan antarabangsa.

Tokoh wartawan, Tan Sri Samad Ismail dalam kata pengantarnya berkata, buku itu wajar menjadi buku bacaan wajib di pusat pengajian tinggi negara yang mengikuti bidang komunikasi kerana banyak pihak mengadu negara kekurangan buku rujukan mengenai media massa yang ditulis oleh pengamal media tempatan.

(END)